

Xan Inaatel Pol laa sin no Epeso

¹ Iaa, Pol, xan aposal Iesu Karisito sin xan sirsiir Morooa.

Iaa atalaa abala inaatel laa sin xan no inaman pat Morooa in Epeso, di ta taalnge watwat lalon Iesu Karisito.

² Amiimiilam ma malina a laa sin gim xaal sin Morooa iwaa xida Mom ma Orong Iesu Karisito.

Tubudaan ina Nantanua lalon Iesu Karisito

³ Paipa'ii a laa sin Morooa, xan Mom xida Orong Iesu Karisito, iwaa tii se atubudaani gita lalon balalangit taman no mat maarang axaa in Nantanua lalon Karisito.

⁴ Amuina tii se axanei gita lalon Karisito setauan tsaa, tii xap mager axosngi xolkolmoxo, ngali gita na pat ma na xap xa namaang tsaxa nan no matan amuina Morooa a titii gita.

⁵ Morooa tii se xanei gita setauan ngali gita ba tsap xan no tsinore malen xan no tsi so lalon Iesu Karisito, balawaa xan tataton ma xan sirsiir.

⁶ Gita na pa'ii xan minaalam ngali xan sal mamainaang tii se tali sin gita biao amiimiilam ta usli buxa sin sawe xan xos ina tsi tii se xosaraa.

⁷ Sin ia, Morooa tii se iil mulangenai gita taman dalan Iesu, ga adodolii xida no namaang tsaxa, lalon abala sal Morooa asen we, biao xan amiimiilam ta suk minaas buxa.

⁸ Tii tali no daan mat laxen sinaae ma adodo ta leng sin gita.

⁹ Ma Moroaa tii ga alengi sin gita biao no maarang tii xuxii sin xan sirsiir amusili xan adodo mamainaang, biao tii ngiti ngali xosaraa sin Karisito.

¹⁰ Balawaa ngitngit, biao Moroaa naba taxaa puua sin abia xan leng so, ma naba axumuli no maarang araraa lalon balalangit ma nan balan pula, di ba man paina Karisito malen lalaamua ta xuuk mu.

¹¹ Moroaa tii axilangi giem no Jiu ngali tsap xan no inaman biao tii axumuli giem lalon Karisito. Tii axilangi giem amuina tii se adodo setauan tsaa ngali xosaraa abala. Biao xan ngitngit tii ga xosaraa no maarang araraa tii ga tsap malen tii se ngiti.

¹² A xosaraa abala ngalibi, giem biao no nanaaxuuk ngali liliis taman tinaalnge lalon Karisito, ngalibi giem ba pa'ii Moroaa ngali xan minaalam.

¹³ Ma gim bula gim se tsap xan no inaman Karisito biao gim tii alongmen abia soina totore, biao inesaait mamainaang ina nagim atotoaa xa. Moroaa tii tali iwaa Nantanua Pat biao ta xubatsi ngali asen we, gim xan no, biao gim ta se taltaalnge lalon Karisito.

¹⁴ Amuina Moroaa a se tali Nantanua Pat sin gita, ngali gita ba atii so we Moroaa naba tali biexaa maarang axaau ta se xubatsi. Gita ba adi abala no maarang sin biao leng Moroaa naba ta iil mulangen araraai gita. Gita ba pa'ii ia ngali xan xaraxin minaalam.

Pol a ningning ma ga putsangi axaau sin Moroa

¹⁵ Ngali abala muina, biao iaa tii alongmen nagim tinaalnge lalon Orong Iesu ma nagim titii ngali xan no inaman pat araraa Moroa,

¹⁶ iaa tii xap mager iaawis sin putsangi axaau ngali gim, biao iaa ta adodomi gim, lalon nugu no sausawit.

¹⁷ Ma iaa tigiri ningning we, iwaa xan Moroa xida Orong Iesu Karisito, iwaa Mom ina minaalam, naba tali Nantanua Pat sin gim, ngali gim ba tsap no unsinaae ma ngali luba alengi inesaait, ngalibi gim ba atik axaautsi ia buxa.

¹⁸ Iaa sawit bula we naba tiltsomi gim ngali leng axaau sin soina, ngalibi gim ba pupua ngali atii abia liliis taman tinaalnge sin abia tii se ilei gim. Iaa ningning bula we gim ba atii xan minaas ina minaalam sin xan tubudaan Nantanua, biao Moroa tii se xubatsi ngali xan no inaman pat.

¹⁹ Ma iaa sawit bula we gim ba atii xan xaraxin xoror asuk buxa ngen no xoror araraa. Xan xoror atiltsomi gita biao gita ta taltaalnge sin ia. Balawaa uk xoror xaraxin watwat,

²⁰ biao Moroa tii taxaa taman biao tii atapaasi Karisito ngali tino mula, ma ga atsotsoi ia sin xan lima mua balalangit.

²¹ Karisito a lapalaa buxa sin abia no angelo axaau ma no tanua tsaxa, xan banam, asuk lot buxa ngen abia banam ina no lalaamua araraa, talaawaa ma laaliu.

²² Moroa a tali banam sin Karisito ngali laamuangen no maarang araraa, ma ga axilangi ia ngali tsap lalaamua papan no maarang araraa

ngali xan axaau xan matenaanua Moroaa.

²³ Biaa xan Matenaanua Moroaa a malen xan pakpak Karisito. Biaa ta us taman xan tino Karisito biaa ta axubiti no maarang araraa sin no sal araraa.

2

Tino lalon Karisito

¹ Gim malen no inaman biaa di tii se met amuina gim tii xap lolong amusili Moroaa ma gim ga xosaraa no namaang tsaxa.

² Gita tii amusili no namaang morokon malen xolkolmoxo ina inaman di tii xap atii Moroaa. Gita tii laamuangen no tanua tsaxa biaa di tii man nan wang. Ilawaa tanua amusili Saatan iwaa lalaamua tsaxa ta lo taktaxaa tsaa lalon xadi no butsa abia no inaman biaa di tii xap amusili xan no totore Moroaa.

³ Ti laamua, gita bula, gita tii amusili di. Gita tii amusili no namaang ina angen tsaxa biaa gita ta saan ngali xosaraa. Gita xosor amusili namaang ina no sasaa morokon ina xida no pakpak ma xida no adodo morokon. Gita tii no inaman biaa Moroaa tii magaa mii gita malen biexaal bula.

⁴ Oro amuina sin xan xaraxin titii Moroaa ngali gita, tii ga suk minaas taman biirbirum ngali gita.

⁵ Amuina sin xida no namaang tsaxa, gita tii malen abia no inaman di ta se met, oro Moroaa tii ga tali tino uul sin gita malen mu tii tali tino uul sin Karisito. Amuina sin xan amiimiilam Moroaa mu, tii ga atoa gim.

⁶ Ma Moroaa ga atapaasi gita xaal sin minet mii Karisito ma tii ga atsotsoi gita mii ia, tade balalangit biaa gita tii ukbal mii Iesu Karisito.

⁷ A xosaraa abia ngali naba asen sin no inaman xan namaang mamainaang lalon abia sal, sawe Iesu Karisito tii xosaraa ngali gita, ngalibi sin abia no miet araraa ta xaalame, no inaman di ba lasi xan sen mat amiimiilam biaa ta lot buxa ngen biexaa mat maarang.

⁸ Amuina sin xan amiimiilam mu Morooa, biaa gim tii ga tuo lalon tinaalnge, balawaa tii xap xaal sin gim tsaa, oro xan tinabel Morooa.

⁹ A xap xa naba pupua ngali paraak taman abia tinabel ina atotoaa xa, amuina a xap xaal sin nagim no tinaxaa.

¹⁰ Amuina gita tsaa gita xan no tinaxaa Morooa iwaa tii axosngi gita malen no inaman uul lalon Iesu Karisito ngalibi gita na xosaraa no tinaxaa mamainaang biaa Morooa tii setauan xosaraa.

Gita xuuk lalon Karisito

¹¹ Biaabi, di tii taxaana gim no Gentail, adodomi gim tii sen we ti. No Jiu, di putsangi gim no muun xaskasau ina inaman. Di paare weaatala amuina di we, di tsaa xan no inaman Morooa amuina di ta axasau di. Oro xasau mu biaa xadi namaang no taamat di ta xosaraa sin no isuaan no taamat.

¹² Gim na adodomi we, sin abia no leng, gim tii man palaaen Karisito. Gim tii xap no inaman in Israel. Gim no xibong ina abia xuxubu Morooa ta xosaraa mii no Jiu. Gim tii manman lalon abala xolkolmoxo ina inaman ma gim tii xap atii Morooa ma tii xap liliis taman tinaalnge ngali tino laaliu mii ia.

¹³ Oro ti gim tii man palaaen Iesu Karisito, oro talaawaa gim se manman lalon ia. Morooa tii se

giwaa gim ngali xaalame atataen ia tsaa sin xan dal Karisito.

¹⁴ Karisito ia tsaa tii se xosaraa malum labatina no Jiu ma no Gentail. Ti laamua, biexa barateng ina ngungus labatina di bula. Oro talaawaa Karisito tii se beklia abia barateng ma tii ga axumuli no xumkumul tii lua ngali na tsap axuuk.

¹⁵ Xadi no lo no Jiu a xudu oro Karisito tii se sibilenli abia no lo taman xan dal, ngalibi naba axumuli no Jiu mii no Gentail ngali laa atataen ma ngali xosor auuli xa taamat. Balawaa sal tii xosaraa no Jiu ma no Gentail ngali di ba xap ngutsulen engen di.

¹⁶ Karisito tii met papan tongol ngali axumuli todomien no xumkumul tii lua ngali tsap xuuk pakpak ma di tii ga ukbal mii Morooa. Amuina sin abala, di ba xap ngutsulen engen di sebula.

¹⁷ Karisito tii xaalame lalon xolkolmoxo ina inaman tii ga baais taman malum sin gim, biala gim tii man palaaen Morooa ma tii ga baais taman malum sin abia di, di tii man atataen ia.

¹⁸ Sin xan minet Karisito, giem no Jiu mii gim no Gentail, gita tii ga pupua ngali xaalame atataen Morooa amuina Nantanua Pat tii tiltsomi gita araraa.

¹⁹ Biaabi, talaawaa gim no Gentail, gim xap xibong, oro gim tii se tsap uk inaman ina maradaan ta xuuk mii xan no inaman Morooa. Gim no inaman, gim, xan no matenaanua Morooa.

²⁰ Gim bula, gim malen xa anua. No aposal ma no propet di malen xa atkale, biala anua ta til papan, mii Iesu Karisito malen xaraxin at laba ina anua.

²¹ Ia iwaa ta taxaariiti todomien abia anua ma ga xosaraa ngali naba tsap lot, ngalibi naba tsap Xan Anua Pat Moroaa ngali langaari laa sin Orong.

²² Amuina gim tii man etudim mii Karisito, Karisito bula tii esumae todomien gim, ngalibi gim ba tsap abia anua biala Moroaa ta tino sin Nantanua Pat.

3

Pol iwaa unbabaais laa sin no Gentail

¹ Sin abala muina iaa, Pol, xan xaus Iesu Karisito ngali nagim axaau no Gentail.

² Iaa atii gim tii se lolong xaa tsaa taman abala tinaxaa, biala Moroaa tii se tali sin iaa sin xan amiimiilam ngali tiltsomi gim.

³ Moroaa tii se alengi iaa taman biexaa maarang biala tii xap mager alengi sin no inaman. Iaa tii se atatal dokdok tsaa laa sin gim taman abala.

⁴ Nawe gim ba xoxoti abala, gim ba pupua ngali leng axaau sin nugu asasing taman xan ngitngit xuxii Karisito.

⁵ Ti laamua tsaa, Moroaa tii xap paate alengi abala ngitngit sin xida no utmilmil oro talaawaa, Nantanua Pat tii se paate alengi sin no aposal pat mii no propet.

⁶ Balawaa xan ngitngit xuxii Moroaa, no Gentail mii no Jiu, di ba tapkina xan no maarang axaau araraa Moroaa, amuina sin abala inesaait mamainaang. Delulu ba tsap pakpak ta xuuk, ma no Gentail di ba tapkina no tubudaan araraa mii

no Jiu biao Moroaa ta xubatsi sin Iesu Karisito laa sin xan no inaman.

⁷ Iaa tii tsap malen xa untutule ina inesaait mamainaang sin abia tinabel ina xan amiimiilam Moroaa biao tii atapaasi xan xoror ngali taxaa lalon iaa.

⁸ Iaa suk mangutngut buxa lalon nugu xalkale labatina xan no inaman pat Moroaa, oro Moroaa tii tali abia amiimiilam sin iaa ngalibi iaa ba pupua ngali baais sin no Gentail taman abia no maarang axaau Karisito ta tali. Biao ta lot buxa no ngen sawe no inaman di ta pupua ngali leng sin.

⁹ Tii tali bula abala tinaxaa sin iaa, ngali alengi no inaman araraa ngali naba sen araraai we xan ngitngit. Moroaa iwaa tii axosngi no maarang araraa sin atiltsoli so, tii taxaariiti xan ngitngit biao tii xuxii lalon no matan no inaman.

¹⁰ Oro talaawaa, balawaa xan sirsiir, ngali asen no angelo araraa ma no tanua tsaxa ta sen sinaae we sin no maarang araraa. Tii tali abala tinaxaa sin xan matenaanua Moroaa ngali xosaraa abala.

¹¹ Tii ngiti ngali xosaraa abala setauan tsaa biao tii xap mager axosngi xolkolmoxo ina inaman, talaawaa tii se atsapngen sin sawe Iesu Karisito xida Orong tii se xosaraa.

¹² Lalon xida taltaalnge sin Karisito gita ba man etudim mii ia, ma gita tii pupua ngali laa sang an Moroaa lalon tinaalnge ta xap xa minataa.

¹³ Amuina sin abala, iaa ningi gim ngali gim na xap lolbiir biao iaa tii saae sosong ngali gim, oro biao nagim mangmangle xa sin abala.

Pol a sausawit ngali no Epeso

¹⁴ Sin abala muina iaa ga sage putput laamuaan Mom.

¹⁵ Tii axosngi no maarang araraa ta tino tade balalangit ma papan balan pula.

¹⁶ Iaa sawit ngali naba tiltsomi gim xaal sin xan minaas ina xan minaalam, ngalibi sin xan Nantanua Pat, gim ba ie watwat buxa lalon gim tsaa.

¹⁷ Ngalibi Karisito naba tigiri tino lalon nagim no butsa sin tinaalnge. Iaa ga ningning we, gim xuxuuk gim ba titii Morooa ma gim ba tilwatwat lalon abia titii malen ie, xan no baa ta tsiga laa lalon pula, ma ga malen anua di ta tumaraa papan atkale.

¹⁸ Xan no inaman pat Morooa, di ba pupua ngali atixi Karisito, ta sen titii buxaai gita we. Xan xaraxin titii ngali gita a xap xa puapua ina.

¹⁹ Iaa sawit bula ngali we gim ba atixi xan titii biao ta xap xa taamat na pupua ngali leng sin, ngali gim ba maatkel lalon no sal araraa, malen mu Morooa.

²⁰ Gita na pa'ii Morooa! A ie watwat ngali xosaraa abala no maarang ta lot buxa ngen xaa was gita ta ningi sin o gita ta adodo we a pupua ngali xosaraa. A pupua ngali xosaraa abala, amuina a suk taxaa watwat lalon gita.

²¹ Gita na pa'ii Morooa ngali xaraxin watwat lalon xan matenaanua Morooa ma lalon Iesu Karisito. No utmilmil araraa, di na pa'ii ia laaliu ma laaliu. Aso.

4

Til etudim lalon xan pakpak Karisito

¹ Iaa Pol, iwaa xaus amuina iaa ta taktaxaa ngali Orong Iesu, iaa ningi awatwati gim ngali tino tutiik lalon sal Moroaa tii ilei gim ngali tino lalon.

² Gim na tigiri adokdoki gim tsaa ma mangmagus, ma liliis adamis. Gim na etitii engen gim xuxuuk, nawe di xosaraa namaang mamainaang o namaang tsaxa sin gim.

³ Iwaa Nantanua Pat tii todomien gita ngali man etudim lalon xumul ta xuuk. Gim na taxaa watwat ngali man etudim lalon malina biaa ta taxaa todomien gita.

⁴ Gita malen no xolkolot ina uk pakpak ta xuuk ma gita ie Nantanua Pat ta xuuk ta manman lalon gita. Sin abia uk sal, Moroaa tii ilei gita ngali liliis taman tinaalnge ngali abia uk tubudaan biaa tii xubatsi.

⁵ Gita araraa gita ie uk Orong. Gita araraa gita taltaalnge sin abia uk asasing ma gita araraa gita adi abia uk axaxadaan.

⁶ Gita langaari araraa sin aia uk Moroaa iwaa xida Mom araraa; a laamuangen gita araraa, ataxaa lalon gita araraa ma a manngi gita araraa.

⁷ Oro Karisito a se tali sin gita xuxuuk no mat laxen tinabel lalon Nantanua Pat ngali xosaraa xan tinaxaa. Tii adodo ngali na sen tabiel we taman abala no tinabel.

⁸ Balawaabi Moroaa ga paare,

“Mil sin ta aiepatsaa xan no matenkorot, tii xale lapalaa sin abia xalkale lapalaa;

Tii giwaa no matenkorot mii ia biaa tii aiepat-saa di

ma ga tali no mat laxen tinabel araraa sin no inaman.”☆

⁹ Biaa ta paare we: “A laa lapalaa sin abia xalkale lapalaa,” sen muina abala? Balawaa no totore a we Karisito tii se xaalame tsaa lapula nan xolkolmoxo ina inaman.

¹⁰ Iwaa ta xaalame lapula lalon abala xolkolmoxo, ia iwaa uk taamat mu ta xaale lapalaa balalangit ngalibi naba manngi no xolot araraa.

¹¹ Ia iwaa ta axilangi biexaa inaman ngali tsap no aposal; biexaal ngali tsap no propet, biexaal ngali tsap no ewangelis, biexaal ngali tsap no paasta ina xan matenaanua Morooa ma no unaasasing.

¹² Tii xosaraa abala ngalibi balawaa no inaman di ba xosaraa xan no inaman Morooa ngali di ba taxaaturung ngali abia inatalil ngali ia, ngalibi no untaltaalnge, biaa xan pakpak Karisito naba tsap watwat ma maatkel.

¹³ Ma ngali gita araraa gita ba tsap xuuk lalon xida tinaalnge ma lalon xida sinaae ina xan tsi Morooa; gita ba tsap no taamat ma aina laba, ngali tsap malen xan puapua Karisito.

¹⁴ Biaabi gita na xap bula malen no tsi dokdok, tun ta lii di laa laamua ma laa mil ma maal ga maalen di laa tile ma tilo. Balawaa no maal ma tun biaa xadi no daraxe no unaababaa. Di ta xonon ngali apanaai no inaman taman xadi no asasing daraxe.

¹⁵ Oro, gita na papaare taman soina ma titii ngali biexaal, gita na tsik ma atsapngen xan no namaang Karisito iwaa xida Xo.

¹⁶ Karisito asumaa todomien xan no inaman araraa, ngalibi gita ga malen no luat biaa ta

☆ 4:8 4:8 Saam 68:18

asumaa todomien no xolkolot araraa ina pakpak ina taamat. Ma nawe no daan xolot di taxaa axaau, a tsik ma ga tsap watwat ma di ga etitii engen di buxa.

Gita na tino malen notsi ina laleng

¹⁷ Biaabi iaa ga asaait alengi gim taman abala banam biao Orong tii tali sin iaa. Iaa we ina atewaai awatwati gim, ngali gim na xap amusili bula xadi namaang no Gentail di tii xosaraa taman xadi no adodo gomsaa.

¹⁸ Ma di ga xap leng axaau sin xan no maarang Morooa. Ma di man palaaen abia tino Morooa tii tali. Amuina di xap atii Morooa amuina xadi no butsa a suk watwat buxa malen xaat.

¹⁹ Amuina di se xap mangiel, di se putsii di tsaa ngali xosaraa no maarang ina minangel. Di xosaraa no mat laxen namaang tsaxa ina exus ma di ga xap iaawis sin manginngin ngali xaal bula ina abala no maarang.

²⁰ Oro gim tii xap asasing ngali xosaraa abia mat laxen namaang biao gim tii asasing taman Karisito.

²¹ Asuk so gim tii se longmien no totore ina ia, di ga asingan gim taman abia soina lalon Iesu.

²² Balawaabi sawe gim tii asasing taman: Gim nangaam xosaraa no maarang gim tii xoxosaraa ti. Nagim no sasaa tsaxa tii apanaai gim ma ga tsaalen nagim no tino.

²³ Gim na papaalii Morooa na xosor auuli nagim namaang ina adodo.

²⁴ Morooa a se tali biao butsa uul sin gim biao ta malen xan butsa tsaa. Biaabi gim na amusili

abia no namaang uul. Gim na suk tutiik so ma pat.

²⁵ Biaabi gim xuxuuk gim na xap abaa bula, gita araraa gita na paare taman soina sin xida no inaman atataaen gita, amuina gita araraa gita xuuk lalon xan pakpak Karisito.

²⁶ Nawe gim magaa, gim nangaam xosaraa namaang tsaxa. Pal na xap tsurii taman nagim no minagaa.

²⁷ Gim na xap tali xa xolot sin Saatan ngali na xonon gim.

²⁸ Iwaa unpulapula na se xap sin pulapula ma na se atiltsaxali taktaxaa, ngali na se xosaraa xaa was ta axaau buxa taman no liman tsaa, ngali naba pupua ngali exasen xan no maarang mii no muunwas.

²⁹ Gim nangaam paare tsaxa ngali biexaal biao naba ta tali xirabas, oro gim na paare taman pa-paare naba ta tiltsomi no inaman ngali tilwatwat lalon xadi no tinaalnge. Gim na paare taman sawe di ba ta saan ngali alongmen ngalibi nagim no totore naba tiltsomi di ngali tilwatwat.

³⁰ Gim nangaam alolbiri xan Nantanua Pat Morooa; Nantanua Pat a malen xa axixila biao Morooa tii aturungi papan gim, ngali asen we, gim xan no Morooa, ngali asen we Morooa naba gii mulangen gim sin xapkap ina no leng naba ta xaalame.

³¹ Gim na saali abia no bal tsaxa araraa, bal lalep, ma minagaa, inesas, ma papaare tsaxa mii no mat laxen namaang morokon.

³² Oro gim na xosaraa namaang malus engen gim xuxuuk ma gim na asen biirbirum. Morooa

naba adodolii nagim no namaang tsaxa sin sawe Karisito tii xosaraa sin gim. Biaabi biaa no inaman di tii xosaraa namaang tsaxa sin gim, gim na adodolii xadi no namaang tsaxa.

5

¹ Biaabi, malen gim xan no tsi Morooa biaa ta titii buxaai gim, gim na atolomi ia.

² Lalon nagim no leng araraa, gim na tigiri titii biexaa inaman, malen mu Karisito ta titii gita ma ga met ngali gita, a tali xan tino sin Morooa malen abia tinabel, ta tso marir laa sin Morooa.

³ Oro labatina gim, na xap xa pu mat laxen namaang tsaxa ina exus o xa mat namaang ta xap mixat o xa namaang ina mataxaaxaa, amuina balawaa a xap axaau sin xan no inaman pat Morooa.

⁴ Gim bula gim nangaam papaare taman no maarang naba ta amangieli gim, o gim na nangaam paare tangtangabaa, ma ngali solok tsaxa. Balawaa no maarang a xap tutiik ngali gim, oro gim na putsangi axaau sin Morooa ngali sawe tii xosaraa ngali gim.

⁵ Gim na suk atik axaautsi we, a xap xa tsuliu o a xap xa mixat ma angen tsaxa, iwaa angen tsaxa a malen iwaa xa ta langlangaari laa sin no malagan, naba xap xaal ina abala no inaman di ba tapkina no maarang axaau ina xan Maradaan Karisito ma Morooa.

⁶ Gim nangaam poroklii xa na apanaai gim taman xakaa papaare gomsaa, amuina sin abala no namaang tsaxa, biaa xan minagaa Morooa

naba xaalame papan abia di, di tii xap long amusili ia.

⁷ Biaabi gim na xap man etaxaa mii abia no inaman di ta xaa xoxosaraa no namaang morokon.

⁸ Setauan tsaa, gim tii manman nan lodo, oro talaawaa gim se tsiga lalon laleng, amuina gim se man etudim mii Orong. Biaabi gim na tino malen no tsi ina laleng.

⁹ Amuina waawaan ina laleng atsapngen no namaang axaau araraa biao ta tutiik ma ta so.

¹⁰ Gim na xonon ngali atii biao no maarang naba ta atatoni Orong.

¹¹ Gim nangaam til etudim ngali xosaraa no namaang biao no inaman di ta xosaraa biao di ta manman lalon lodo. Biao no maarang di ta xosaraa, a xap atsapngen xaa waawaan. Oro gim na asen sin inaman we balawaa no maarang a morokon.

¹² Xaraxin minangel so ngali paare taman se-maarang no muun lolong di ta xosor axuina.

¹³ Biao laleng ta tsila papan xawas, no inaman araraa di ba pupua ngali lasi ta sen mat we.

¹⁴ Amuina biao laleng naba asen no maarang araraa nan waa, biao maarang tsaa naba tsap laleng. Biaabi no inaman di ga paare,

“Gim pade, no unurange;
ma gim na tapaas xaal sin minet,
ngali Karisito naba tsila papan gim.”

¹⁵ Gim na suk tilaamamil axaau sin gim ta sen tino we. Gim nangaam tino malen no ngong oro gim na tino taman sinaae.

¹⁶ Gim na se taxaa axaau taman sinaae sin abala no leng, amuina balawaa no leng a morokon.

¹⁷ Biaabi gim na xap tino tangtangabaa, oro gim na sinaae sin sawe Orong ta saan ngali sin gim.

¹⁸ Gim nangaam nun tangtangabaa taman waain, biao naba ta tsaalen gim, oro gim na us taman Nantanua Pat.

¹⁹ Gim na epaare engen gim taman no ararouk ina paipa'ii biao Dewit ta atalaa, ma no ananaan ina Nantanua, anaan ma paipa'ii laa sin Orong lalon nagim no butsa.

²⁰ Gim na tigiri putsangi axaau laa sin Morooa, xida Mom ngali no maarang araraa, sin iesan xida Orong Iesu Karisito.

²¹ Gim na adokdoki gim tsaa xuxuuk, taman mangmangle, amuina gim manglen Karisito.

No taamat minaxis ma aina minaxis

²² No aina minaxis, gim na adokdoki gim tsaa paina nagim no maxis malen mu gim ta adokdoki gim paina Orong.☆

²³ Amuina iwaa taamat minaxis ia lalaamua ina xan tubu malen mu Karisito ia lalaamua ina xan matenaanua Morooa biao xan pakpak. Ma Karisito ia iwaa ta atoaa gita, xan no inaman, sin xida no namaang tsaxa.

²⁴ Biaabi malen mu xan matenaanua Morooa ta adokdoki ia tsaa sin Karisito, biao bula no aina minaxis, gim na suk adokdoki gim tsaa sin nagim no maxis sin no maarang araraa.

☆ 5:22 5:22 1Pi 3:1

²⁵ No taamat minaxis, gim na titii nagim no tubu malen mu Karisito ta titii xan matenaanua Moroa ma ga tali xan tino ngali ia.☆

²⁶ A xosaraa abala ngali apati ia ngali tsap mixat. Biaa gita ta alongmen xan no totore ma gita ga taltaalnge, a sili gita taman daan lalon xan no totore.

²⁷ A xosaraa abala ngalibi biaa xan matenaanua Moroa naba matmirmir biaa naba ta giwaa xan matenaanua Moroa malen xan tubu tsaa, iwaa naba ta xap xaa pun o xaa totorade sin oro naba suk mixat ma tutiik.

²⁸ Sin abia uk sal no taamat minaxis di na titii xadi no tubu malen di ta titii xadi no pakpak tsaa. Iwaa taamat ta titii xan tubu, a titii ia tsaa.

²⁹ A xap xa na ngutsulen xan pakpak tsaa oro atabali xan pakpak ma ga tilaamamil sin, malen Karisito ta tilaamamil sin xan matenaanua Moroa.

³⁰ Amuina gita no xolkolot ina xan pakpak Karisito.

³¹ Malen inaatel ta paare, "Biaabi taamat naba poroklii xan mom ma nagaa ma na tsoxo sin xan tubu, ma delu ba tsap xuuk pakpak mu."☆

³² Balawaa xaraxin totore xuxii, oro iaa paare taman Karisito ma xan matenaanua Moroa.

³³ Biaabi gim no taamat minaxis xuxuuk gim na titii nagim no tubu malen gim ta titii gim tsaa ma gim no aina minaxis xuxuuk gim na manglen nagim no maxis.

6

No tsi ma xadi no mom ma nagaa

¹ No tsixi amuina gim manman lalon Orong gim na long amusili nagim no mom ma nagaa, amuina balawaa namaang asuk tutiik.

² “Gim na manglen nagim no mom ma nagaa,” balawaa nanaaxuuk ina lo taman abia xuxubu.

³ “Gim na xosaraa abala ngalibi gim ba tino adis papan abala balan pula.”☆

⁴ No Mom gim nangaam xosaraa nagim no tsi ngali amagaai di oro gim na asingan di ma anaai di lalon xan namaang Orong.

No untutule ma xadi no manmanel

⁵ No untutule, gim na long amusili nagim no manmanel ina abala balan pula taman mangmangle xa ma minataa ma taman abia butsa ta axaau, malen mu gim ta long amusili Karisito.

⁶ Gim na tigiri long amusili di, a xap we sin di ta atsotsoxo mu ngali di ba paipa’ii gim; Oro gim na long amusili di malen xan no untutule Karisito. Gim na xosaraa samaarang Morooa ta saansili gim ngali xosaraa lalon nagim no butsa.

⁷ Gim na xosaraa no tinaxaa taman tataton lalon nagim no butsa, malen gim ta xosaraa ngali Orong ma a xap ngali no inaman.

⁸ Amuina nawe gim no untutule o gim no taa-mat leiwaa, gim atii we Orong naba atubudaani gim ngali nagim no tinaxaa axaau araraa.

⁹ No manmanel, gim na asen namaang axaau laa bula sin nagim no untutule ma gim nangaam paare we, iaa ba tsaapi gim nawe gim xap xosaraa nagim no tinaxaa. Gim na adodomi

we gim araraa gim ie uk manmanel iwaa tile balalangit, ma a xap xosaraa xa na xaatsap sin biexaal.

Xan no ugauga Moroaa ina inesas

¹⁰ Nugu no xapkap ina totore abala, gim na alet watwat sin Orong ma gim na alet watwat bula sin xan xaraxin xoror.

¹¹ Gim na tamtuel lalon abia no ugauga araraa ina inesas Moroaa ta tali no sin gim, ngalibi gim ba pupua ngali til banti Saatan taman xan no morokon ina inaabaa.

¹² Amuina gita xap sas mii no inaman toto, malen gita tsaa, oro gita sas epuske mii no lalaamua ma no unbanam, no xoror ina abala xolkolmoxo ta lodo, ma no tanua morokon in tade lapalaa balalangit.

¹³ Biaabi talaawaa tsaa gita na tamtuel lalon no ugauga araraa ina inesas Moroaa ngalibi nawe leng ina no morokon naba tsap, gita ba pupua ngali tilkaali di. Biaa gim ta se xosaraa no maarang araraa gim ba tilwatwat.

¹⁴ Biaabi gim na tilwatwat, taman abia biaal ina soina ta ros ulti no balan gim, taman abia bakbaxil ina inatutiik papan no bongbongon gim.

¹⁵ Tamtuel lalon nagim no bubut. Balawaa no bubut a til axilangi malina, biao ta xaal sin Inesaait Mamainaang ma ga taxaaturungi gim ngali inesas.

¹⁶ Ma ngali asumaa abala no araraa, taxaariti abia sakbaa ina tinaalnge; taman abia sakbaa mu, gim ba pupua ngali pusi xan no urur rarar Saatan, biao naba ta tsoxaa gim taman.

¹⁷ Gim na tsoben abia tsotsobe biao ta tilaamamil sin no xuan gim. Biao tsotsobe ina atotoaa xa, ma biao bainat ina Nantanua biao xan totore Morooa.

¹⁸ Gim na tigiri sausawit sin no leng araraa malen Nantanua ta laamuangen gim. Biao gim ta ningning, gim na xosaraa no mat laxen ningning. Gim na adodomi, gim na taxaaturung, ma gim na tigiri ningning ngali xan no inaman pat araraa Morooa.

¹⁹ Ma gim na sawit bula ngali iaa ngali Morooa naba tali xaa totore na tutiik sin iaa ngali papaare taman Karisito sin no leng xuxuuk. Ngali iaa ba xap mata ngali asaait axaautsi no inaman taman soina, biao tii man xuxii ma talaawaa Morooa a se asen sin gita biao inesaait mamainaang.

²⁰ Iaa til axilangi Karisito ngali asaait taman abala Inesaait Mamainaang, sin abala muina no inaman di ga aturungi iaa lalon anua lodo. Gim na sawit sin Morooa ngali iaa, ngali naba tali watwat sin iaa ngali baais taman inesaait mamainaang malen iaa na xosaraa.

No xapkap ina putsangi axaau

²¹ Taitsikas, xida xos so ina taamat ma untutule axaau lalon Orong, naba asaaiti gim araraa ngalibi gim bula, gim ba atii, iaa ta sen man we ma sawe iaa ta xoxosaraa.✧

²² Biaabi, iaa ba tulen ia laa sangan gim, ngalibi gim ba atii, giem tii sen manman we, ngali naba pupua ngali anaai gim.

✧ **6:21 6:21** Apo 20:4; 2Ti 4:12

²³ Moroaa xida mom ma xida Orong Iesu Karisito naba tali malum sin gim, no untaltaalnge. Ngali Moroaa naba pupua ngali xosaraa gim ngali titii engen gim ma ngali gim ba tigiri taltaalnge sin Karisito.

²⁴ Amiimiilam a laa sin abia di araraa di ta titii xida Orong Iesu Karisito, biao titii ta xap xa xapkap ina.

Inesaait Mamainaang Laa Sin Notsi
The New Testament in the Notsi language of New
Ireland Province, Papua New Guinea

Copyright © 2024 Wycliffe Bible Translators, Inc.

Language: (Notsi)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-08-14

PDF generated using Haiola and XeLaTeX on 14 Aug 2025 from source files dated 14 Aug 2025

601480e7-130d-5189-be42-9e43a92dbdde